

- 85 daz er straucht über einen stain,  
do zemüschet er ein pain  
underhalb der gurtel sein.  
fraw mynne durch den willen dein  
uerleit er guter sache uil.
- 90 die dritten rais ich nicht enwil  
uersweigen uon dem degen gut.  
in einem ofen stund sein mut,  
in was nach den dürren pirn gach,  
ein grozzer schad im do geschach,
- 95 daz er die uinger sein uerprant  
an einer pirn secht, die hant  
hing er in ein pinden.  
ich fand under einer linden  
den stolzen degen mutes chrank,
- 100 er mich ersach, im was zu lank  
die weil und uel in anmacht,  
ein chrug mit äppltrank man bracht  
und labt den degen hochgeporn,  
daz er hiet tawsent aid gesworn,
- 105 im wer geschechen nye mer wee.  
ach schoenes graz und grüner chlee,  
wem sol ich chlagen seine layt.  
ein uart er hin gen Preuzzen rait  
und cham uor uesperzeit herwider.
- 110 er chlagt den ruk und di glieder,  
di waren im czustoszen.  
die chlainen und die grozzen  
trunkch di waren manigualt,  
dauon der degen wart so palt
- 115 und sagt uon abentewre,  
wie im pei einem fewre  
wer uerprant der mantel sein,  
das was noch an der lucken schein,  
die must man im uerpuezzzen.
- 120 die roten mündel muezzzen  
mich pitten umb den namen sein  
und daz ich chünd der wappen schein:  
uon leberwursten ist der rant